

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. मुख्यमंत्री ओमर अब्दुल्ला होरें बजट शा पैहले आहले सलाह—सुत्तर सरबंधी बैठकें दी प्रधानता कीती ते इस गल्लै दा जकीन दोआया ऐ जे बजट, लोकें दिऐं आसैं—तांगें मूजब होग।
2. राई—बाई ते ग्रामीण विकास मैहकमे दे मंत्री जावेद अहमद डार होरें जम्मू—कश्मीर च पर्यावरण दे अनुकूल विकास दी हिमायत करदे होई कठुआ थमां वाटरशैड जात्तरा गी झंडी दस्सियै रवाना करोआया।
3. जम्मू—कश्मीर च 2023—24 आहले ब'रे दरान महात्मा गांधी राष्ट्री ग्रामीण रोजगार गरंटी स्कीम दे 1 लक्ख 8 ज्हार कोला मते लाभार्थिऐं दे नां सूचिएं चा हटाए गे न।
4. राई—बाई मैहकमे दे मंत्री होरें आखेआ ऐ जे महिला करसानें गी सशक्त बनाइयै जम्मू—कश्मीर च टिकाउ विकास जकीनी बनाया जाई सकदा ऐ। उनें कठुआ दे दौरे दरान राई—बाई खेत्तर दे पूरे—पराते विकास आहले प्रोग्राम एचएडीपी दी अमल—आवरी दा जायजा लैता।

<><><><><><>

CM Budget JK

मुख्यमंत्री ओमर अब्दुल्ला होरें जम्मू—कश्मीर लेई लोकें दे अनुकूल बजट पेश करने दी अपनी सरकार दी वचनबद्धता गी पक्का करदे होई इस गल्लै उप्पर जोर पाया ऐ जे बजट तैयार करने दी प्रक्रिया च लोकें दे नुमाइंदें दी शमूलियत कन्नै लोकें दिऐं आसैं—तांगें गी जकीनी बनाया जाई सकोग। आकाशवाणी दे जम्मू संवाददाता दी रिपोर्ट मूजब, जम्मू आहले सिविल सैक्रेटेरिएट च बजट शा पैहले आहले सलाह—सुत्तर सरबंधी बैठकें दी प्रधानता करदे होई मुख्यमंत्री होरें आखेआ जे इ'नें बैठकें दा मकसद, बजट तैयार करने शा पैहले प्रमुख सरबंधत धड़ें थमां उंदे सुझाऽ हासल करना ऐ। इस बैठका च अनंतनाग, बडगाम, कठुआ ते सांबा जिलें दे विधायकें ते जिला विकास काउंसल दे अध्यक्षें वीडियो कांफ्रेंस दे राहें हिस्सा लैता। ओमर होरें आखेआ जे विधायकें ते जिला विकास काउंसल दे अध्यक्षें दे विचार ते सुझाऽ, औने आहले बजट गी आकार देने च महत्वै आहली भूमिका निभाडन।

<><><><><><>

DC-Kathua Pre Budget

जिला विकास कमीशनर राकेश मिन्हास हुंदी अध्यक्षता च कल जिला प्रशासन कठुआ आस्सेआ जिले दे बक्ख-बक्ख हलके दे विधायकें कन्नै बजट कोला पैहले आला सलाह सूत्र कीता गेआ। डी.सी. दफतरै च लग्गी दी इक बैठका च डॉ. भारत भूषण, राजीव जसरोटिया, विजय शर्मा ते सतीश शर्मा होरें सामग्राम हिस्सा लैता जिसलै जे एमएलए बनी रामेश्वर सिंह होरें वर्चुअली एहदे च शिरकत कीती। बैठका दरान विधायकें अपने अपने इलाके दिएं प्राथमिकताएं गी उजागर कीता जिसलै जे जिला विकास काउंसल दे चेयरमैन म्हान सिंह होरें बी उने इलाकें जित्थें शिड़कां अजें नेई ऐन, उत्थें शिड़क राबतें दी जरूरतै गी उजागर कीता। मगरा डी.सी होरें सारे सुझाएं ते बचार बंटादरे बारे मुख्यमंत्री होरें गी अवगत कराया।

<><><><><><>

Watershed-Yatra

ग्रामीण विकास मंत्री जावेद अहमद डार होरें तेजिया कन्नै होआ'रदे विकास कारण पर्यावरण गी होने आले नुक्सान पर चिंता प्रगट कीती ते आखेआ जे पानी ते पर्यावरण दे संरक्षण बक्खी ध्यान देना अत्त लाजमी ऐ। आकाशवाणी दे जम्मू संवाददाता नै जानकारी दित्ती ऐ जे कल कठुआ जिले दे सरकारी डिग्री कालेज हीरानगर थमां "वाटर शैड" यात्रा गी झंडी दस्सियै रवाना करदे होई उनें आखेआ जे तेजिया कन्नै होआ'रदी तरक्की दे चलदे चपासम दा अन्नेवाह दोहन भविष्य लेई इक बड्डा खतरा ऐ। उनें जोर देइयै आखेआ जे कोई बी विकास कम्म कुदरत दे अनुकूल होना लोड़चदा। उनें आखेआ जे शैहरीकरण ते औद्योगिकरण समें दी जरूरत जरूर ऐ पर इनेंगी चपासम दे अनुकूल तालमेल बठाइयै गै तोड़ चाढ़ेआ जाना लोड़चदा। उनें तलाएं-झीलें, नाडुए, बोलिएं ते होरने जल स्रोतें दे कन्नो कन्नी जंगल ते बाकी कुदरती वसीलें दे संरक्षण पर जोर दित्ता। मंत्री होरें टकोहदा करियै नोजवानें ते विद्यार्थिएं गी आखेआ जे ओह पर्यावरण संरक्षण सरबंधी कम्में च बधी चढ़ियै हिस्सा लैन। मंत्री होरें वाटर शैड यात्रा वैन गी झंडी दस्सियै रवाना कीता जेहड़ी जम्मू कश्मीर दे बक्ख-बक्ख इलाकें च 2 ज्हार 400 किलोमीटर दा पैंडा तैह करियै लोकें च जल संरक्षण बारे जागरूकता पैदा करोग। पैहली मार्च तोड़ी चलने आले इस अभियान दरान केई गतिविधिएं दा बी आयोजन कीता जाग। लोकें गी जल संरक्षण दे नमें तौर तरीके, मिट्टी दे संरक्षण, मिट्टी दे नरोएपन दी परख ते बरखा दे पानी गी जमा करियै रखने दे महत्व बारे बी समझाया जाग। मंत्री होरें डिग्री कालेज हीरानगर च इक बूटि बी लाया, प्रधानमंत्री कृषि सिंचाई योजना दे दुए संस्करण तैहत वोटर शैड विकास सरबंधी केई पैहलकदमिं दी बी शुरूआत कीती।

<><><><><><>

Bamboo Workshop

बंज यानि बांस सरबंधी राष्ट्रीय मिशन दे तैहत्त कल रियासी जिले दे कांजली ग्रां च इक कार्यशाला दा सरिस्ता कीता गेआ। आकाशवाणी जम्मू दे संवाददाता दी रिपोर्ट मूजब, इस कार्यशाला च खरी मती गिनतरी च कारीगरें हिस्सा लैता ते बंज सरबंधी दस्तकारी आहली तकनीकें दा प्रदर्शन कीता। इस पैहलकदमी दा मकसद बंज सरबंधी दस्तकारी कन्नै जुड़े दे मुकामी कारीगरें दे हुनर च बाददना करना ते उन्हेंगी सरकार दे मिशन बारै जानकार बनाना बी ऐ हा तांजे जम्मू-कश्मीर च बंज सरबंधी खेत्तर गी होर मजबूत बनाया जाई सकै। दस्तकारी विभाग जम्मू दिएं ज्वाईंट डरैक्टर ममता देवी होरें इ'नें कारीगरें दा दिल बधाया ऐ जे ओह अपनी कारीगिरी दे कम्में च नमिएं तकनीकें दा इस्तेमाल करन।



Congregation-Basnotra

बसनोत्रा बरादरी दी सलाना मेल कल 7 फरवरी गी गौर ग्रां च चनाह दे कंडे स्थित बाबा खान देव, हुंदे देव स्थान पर लग्गोग। इस सिलसिले च बडलै 10 बजे हवन होग जेह्दे मगरा इक बजे प्रीती भोज यानि लंगर दा सरिस्ता कीता जाग। बरादरी दे प्रधान हुंदे आस्सेआ सब्बने सदस्येंग ी उत्थें आइयै शीरवाद लैने दी अपील कीती गेदी ऐ।



MGNREGS-JK

जम्मू कश्मीर च 2023-24 आले ब'रे दरान महात्मा गांधी राष्ट्रीय ग्रामीण रोजगार गरंटी योजना मनरेगा दे 1 लक्ख 8 जहार कोला मते लाभार्थिएं दे नां सूचिएं चा हटाए गे न ते एह गिनतरी 2022-23 दरान कट्टे गेदे 44 जहार 227 नाएं कोला खरी मती ऐ। आकाशवाणी दे जम्मू संवाददाता नै जानकारी दित्ती ऐ जे एह नां उनें लोकें दे कट्टे गे न जेह्दे फर्जी, जाली जां गलत जां फही उनें लोकें दे नां हे जेह्दे उस केह्डी ग्रां पंचैत चा बाहर उठी गेदे हे जां उंदा इलाका ग्रां नेई रेइयै शैहरी इलाकें च शुमार होई गेदा ऐ। एह जानकारी ग्रामीण विकास राज्यमंत्री कमलेश पासवान होरें कल लोकसभा च दित्ती ते जम्मू कश्मीर इआं करने आले प्रदेशें च 12में नंबरै पर ऐ। इस स्कीम दा इक महत्वपूर्ण हिस्सा ऐ, एहदी समें समें पर नजरसानी करना ते दर्ज लाभार्थिएं दी योग्यता गी नियमित तौरा जांचेआ जंदा ऐ ते कन्नै इस गल्लै दा बी ध्यान रखेआ जंदा ऐ जे कुसै बी योग्य लाभार्थी दा नां नेई कट्टेआ जा।



Dar HADP

राई-बाई, ग्रामीण विकास ते पंचैती राज मैहकमें दे मंत्री जावेद अहमद डार होरें कल कठुआ जिले दा व्यापक दौरा लाइयै उत्थे राई-बाई खेत्तर दे पूरे-पराते विकास सरबंधी कार्यक्रम – एचएडीपी तैहत् जारी गतिविधिएं दा जायजा लैता। मंत्री होरें आखेआ जे इस कार्यक्रम तैहत् करसानें ते खासकरियै महिला करसानें गी मदाद उपलब्ध करोआने कन्नै जम्मू-कश्मीर दा पूरा-पराता विकास जकीनी बनाया जाई सकोग। अपने दौरे दरान मंत्री होरें महिलाएं आसेआ पथवाल च चलाए जा करदे कृष्णा मिल्लेट रेस्टोरेंट दा बी निरीक्षण कीता। एह्दे अलावा उनें जांडी च खुम्बें दी काश्त आहले ग्रां दा बी दौरा लाया ते उत्थे अपनाए जा करदे बक्ख-बक्ख तौर-तरीकें बारै जानकारी लैती। मंत्री होरें मुकामी करसानें ते महिलाएं उद्यमिण कन्नै टकोह्दे तौरा पर गल्लबात बी कीती।



Jatinder Nuclear Mission

केन्द्री मंत्री डाक्टर जीतेन्द्र सिंह होरें कल आखेआ जे केन्द्री बजट 2025-26 च घोषित कीता गेदा 'न्यूक्लीयर मिशन', भारत दे उर्जा सरबंधी खेत्तर च बड्डे बदलाव आहनने आहला होग ते निजी खेत्तर थमां रास-पूँजी, परमाणु उर्जा गी भारत च उर्जा दे सबनें शा बड्डे जरिये दे तौर उप्पर स्थापित करने च मदाद करोग। भारत दी उर्जा सरबंधी सुरक्षा जकीनी बनाने च परमाणु उर्जा दी महत्वपूर्ण भूमिका उप्पर लोऽ पांदे होई डाक्टर सिंह होरें परमाणु उर्जा दे खेत्तर लेई सरकार दी भविष्य सरबंधी रूप-रेखा पर बल दित्ता जेह्ड़ी उर्जा उत्पादन च आत्मनिर्भरता हासल करने दी बत्तै च बड़ा मता जोगदान देग। डाक्टर सिंह होरें 12 लक्ख रपें तगर दी सलाना औंदन पर टैक्स च दित्ती गेदी राहत् आहले ऐतिहासिक फैसले दी बड़ी मती सराहना कीती। उनें आखेआ जे भारत दे परमाणु उर्जा सरबंधी खेत्तर गी निजी खेत्तर लेई खोली दित्ता गेदा ऐ ते इब्बी इक ऐतिहासिक गैह ऐ।



DC Poonch

पुंछ दे जिला विकास कमीशनर विकास कुडल होरें कल जिले दी नियंत्रण रेखा कन्नै लगदे केई सारे ग्राएं दा व्यापक दौरा लाया ते उत्थें इलाके दे समाजी आर्थिक विकास दे लक्ष्य कन्नै शुरू कीती गेदिण विकास परियोजनाएं दी प्रगति दी समीक्षा कीती। इस दरान उनें डल्ला ग्रां च लिफ्ट इरीगेशन ते पानी सप्लाई स्कीमें, देगर तेरवान च पंचैत घरें दे निर्माण देगवर मल्दियाना च कुड़िण दे हायर सकेँडरी स्कूल ते देगर तेरवान आले सरकारी हाई स्कूल दे कम्में काजें दा बी जायजा लैता। उनें प्रधानमंत्री ग्रामीण आवास योजना दी इक लाभार्थी रस्मा बीं गी ओह्दे नमें बनाए गेदे घरै दियां चाबियां सौंपियां जिन्ने एह्दे लेई सरकारै दा आभार प्रगट कीता।

